

MEMORIALE

PRO SORORIBUS MINORIBUS
*Inclusis Monasteriorum Galliae, Ordinis sancti
 Francisci, ab Urbano Papa IV. institutis in regno Franciae.*

SANCTVS Franciscus Ordinem suum sub lege paupertatis Evangelicæ feliciter fundavit anno 1212. Post sex annos foundationis sui Ordinis invenit virginem prudentem & fortem, Claram nomine, Assisiatem, cui regulam tradidit, sub qua se Deo mancipavit, & in civitate Assisii fœmineum Conventum auspicata est.

Sancta Clara dum vixit sequuta est Regulam sancti Francisci, & in fragili sexu docuit firmitatem & robur inveniri, adjuvante Christo.

Verùm cum Summis Pontificibus visum esset hanc vitæ austeritatem vix cum infirmitate sexûs posse compati, & durum aliunde esset recludere Moniales pauperes, quæ victum ostiatim quærere cogebantur; placuit Innocentio IV. & Alexandro IV. Summis Pontificibus primam regulam paululùm mitigare: sed hæc mitigatio certis regulis nondum definita erat. Res ad suum exitum perducta est sub Urbano Papa IV.

His temporibus regnabat apud Gallos Ludovicus IX. qui deinde in Sanctorum numerum relatus est. Ejus soror

A

26



Isabella cognominata, se in Monasterium, quod vulgò *Longchamp* vocatur, tunc dictum Humilitatis beatæ Mariæ, animo pietatis recipere voluit. Quod impulit Ludovicum Regem instare apud Urbanum IV. ut durities & austeritas regulæ mitigaretur.

Annuit votis piissimi & Christianissimi Regis Summus Pontifex, & Bullas suas expediri curavit anno 1263. in quibus de precibus ei à Christianissimo Rege porrectis fit mentio; quibus quidem Bullis, Monialibus Longi-campi prope sanctum Clodoaldum fundatis vitæ regulam minus severam dedit.

Hæ Bullæ, quarum originale adhuc apud prædictum Monasterium servatur, sic ab Urbano IV. precibus Christianissimi Regis condescendente concessæ, Compacti vim debent habere inter Sedem Apostolicam & Reges Christianissimos.

Inter cætera prædictæ Regulæ capita cavetur ut dictæ Moniales, quæ Sorores Inclusæ Minores vocantur, in omnibus subsint regimini Generalis vel Provincialis Ordinis Fratrum Minorum. Insuper statuitur quòd officium Abbatisæ subest electioni Conventûs liberè, & confirmatio seu amotio pertinet ad dictos Ministros Generales, vel in eorum absentia ad Provinciales, ad quos, secundum ipsissima Regulæ verba, ordinatio spectat hujusmodi Ordinis, regimen, visitatio, correctio, necnon reformatio.

His auspiciis hic Ordo floruit, & à fundatore suo denominationem mutuata sunt dictæ Sorores, & vulgò *Urbanistæ* nuncupatæ.

Cùm hæc Regula non esset specialiter facta pro Monasterio *de Longchamp*, sed etiam pro omnibus aliis de

novo fundandis & plantandis, quæ prædictæ Regulæ se-
vellent submittere, ut statutum est in tribus dictæ Regu-
læ articulis; accidit ut brevè pleraque Monasteria sub ea-
dem lege constructa fuerint.

Inter alia celebriora extat Monasterium sancti Mar-
celli prope Parisios, Nongentii, Altaldi, & de Moncelo,
quæ quatuor ab iis de gente & prosapia sancti Ludovici
Regis Christianissimi fundata sunt. Prædicto Monasterio
sancti Marcelli à Nicolao Papa IV. ejusdem regulæ parti-
cipatio indulta fuit speciali ad id Bullâ concessâ ad instan-
tiam Regis Christianissimi Philippi Pulchri nepotis dicti
sancti Ludovici, & Margaretæ, Mariæ & Ioannæ Regi-
narum Franciæ, sexto Kalendas Augusti, Pontificatus di-
cti Nicolai IV. anno secundo.

Deinde per aliam Bullam sub data xii. Kalendas Ia-
nuarii, Pontificatus verò dicti Nicolai Papæ IV. anno
quarto, idem Nicolaus Papa prædictum Monasterium sub
speciali Sedis Apostolicæ protectione suscepit, & specia-
liter statuit ut in posterum obeunte ejusdem Monasterii
Abbatissa, nulla ibi quâlibet subreptionis astutiâ seu vio-
lentiâ præponeretur, nisi quam Sorores communi con-
sensu, vel earum major pars consilii sanioris secundum
Deum & prædictam Regulam providerint eligendam.

Eadem lex aliis Monasteriis & idem privilegium à
Summis Pontificibus concessum est. Eugenius Papa IV.
inhibuit districtè sub pœna peccati mortalis, ne prædictæ
Sorores aliam recognoscerent pro Matre & Abbatissa,
nisi quæ communi totius Conventus aut majoris & sa-
nioris partis suffragio electa fuisset.

Sub hac Regulâ tam sanctè & piè traditâ à Summis

Pontificibus prædictæ Moniales hæctenus pacificè vixerunt, & subiectæ regimini & ordinationi Generalis Ordinis sancti Francisci & ejus Provincialibus respectivè in Provinciis in quibus prædicta Monasteria fundata erant, Matres suas & Abbatissas elegerunt liberè, & independentè ab omni potestate sæculari, & iidem Generales & Provinciales pro tempore ejusmodi electiones gratas & ratas habuerunt.

Nihilominus licèt quadringentorum & ampliùs annorum possessio eas securas reddat, & nulli liceat contra Regulam semel à Summis Pontificibus traditam attentare, quædam Moniales pleræque Ordinis sancti Benedicti, aulicis artibus & solo spiritu ambitionis ductæ, regimina prædictorum Monasteriorum ambierunt, & litteras nominationis à Rege Christianissimo, quas vulgò *Brevet* appellant, obtinuerunt.

Quæ quidem litteræ subreptitiæ & obreptitiæ omnino sunt, & sic nullam vim possunt habere.

Subreptio in eo consistit, quòd verum dictarum Custodiarum Franciscanarum, ^{italianæ} dissimulaverunt: nam supposuerunt esse prælaturas & titulos Beneficiorum, licèt non sint nisi simplices administrationes & officia claustralia, ut inferiùs demonstrabitur.

Obreptio consistit in eo quòd exposuerunt Regem Christianissimum hoc jus nominationis sibi vindicare debere in vim Concordatorum dudum inter Sedem Apostolicam & felicis memoriæ Franciscum Primum Francorum Regem initorum; quia prætendunt omnes omnino electiones abrogatas in partibus Gallicanis per prædicta Concordata, & in earum locum jus Regiæ nominationis esse

esse subrogatum; quod quidem Curia Romana nunquam admisit in Monasteriis Monialium.

Deinde etiamsi Moniales in genere sub terminis Concordatorum comprehenderentur, tamen in exceptione §. per præmissa in dictis Concordatis adjecti omnino reperirentur, quia privilegium à Sede Apostolica per Bullas authenticas habent Custodem seu Abbatissam sibi eligendi. Porro hæc privilegia semper à Sede Apostolica illæsa & intacta huc usque permanserunt.

Quæ quidem ut fiant dilucidiora, & omnibus pateant; primò attendenda est qualitas dictarum Custodiarum. 2º. Ius quod Regi potest competere in his Custodiis. 3º. Privilegia à Sede Apostolica Monialibus S. Francisci indulta, & rem totam brevi ordine texere, ita ut appareat evidenter jus hoc novum, quod hæc Aulicæ Abbatissæ introducere sub prætextu Regiæ nominationis conantur, libertati Canonice & Ecclesiasticæ prorsus adversari, nec posse cum Regulâ ab Urbano Papa IV. traditâ, & ad instantiam Regum Christianissimorum in Galliis receptâ, ullatenus consistere.

Quoad primum. Harum Custodiarum qualitas præcipuè est è propriis Regulæ terminis definienda. Abbatissa seu Monastica Antistes nihil sibi peculiare sumit ex communi fundorum Monasterii proventu ac redditu, sed administratio bonorum temporalium debet esse penes œconomum seu Syndicum Laicum, qui Procuratorio nomine, totius Conventus bona debet recipere & expendere in proprios usus Monialium, & qui de expensis & receptis rationem reddere tenetur.

Eadem Antistes nullis insignibus, quæ à jure Abbatissis

Ordinis sancti Benedicti indulta sunt , gaudet. Paupertas Evangelica & Ordo Seraphicus hæc exteriora dignitatis indicia respuit meritò , tanquam humilitati Christianæ, quæ præcipuè in hoc Ordine commendatur , parum convenientia.

Abbatissa est tanquam prima inter pares ; neque baculum, neque sandalia , neque ulla alia indumenta distincta à cæteris Sororibus potest gestare. Sola virtute ei licet inter alias fulgere ; sed quoad cætera, in omnibus parere debet. In communi dormitorio debet decumbere, cum aliis vitam communem debet ita ducere, ut si præ infirmitate non possit cum aliis Regulam observare, statim sine moræ dispendio ab officio suo absolvatur : quod quidem speciale esse in Ordine Franciscanarum notarunt inter alios præcipuè Cardinalis Caietanus & Doctor Navarrus. Quod etiam bene astringit has Custodias non posse unquam effici titulos Beneficiorum : nam nusquam in jure *cautum invenietur casum infirmitatis esse causam legitimam ad arcendum Rectorem seu Prælatum alicujus Ecclesiæ aut Monasterii à proprio regimine* ; imo potius ut videre est toto titulo, *de Clerico agrotante & debilitato extra*, fructus Beneficii debent integri servari Clerico infirmo ; & secundum Innocentium Papam III. cujus decretum refertur in capite *ex parte*, ejusdem tituli, si non sit spes roboris & valetudinis, & Prælatus ad talem statum adductus fuerit, ut præ infirmitate proprias functiones obire non possit ; tunc ei Coadjutor dandus est , qui eum possit sublevare. *Quia, ut inquit idem Pontifex, afflictio non est danda, sed potius ipsius miseriæ miserendum.*

Vnde patet illud, quod speciale ab Urbano Papa IV. in Regula Franciscanarum notatum fuit, Abbatissam cum non potest vitam ducere communem, statim ab officio suo absolvendam, non sine magna ratione introductum fuisse, ut intelligerent dictæ Matres se non tanquam Prælatas, aliis præfici, sed veluti sedulas & diligentes ministras omnibus aliis Sororibus famulari, & eis semper in vita ducenda communi, proprio exemplo præesse debere; ita ut statim atque propria infirmitas eas ab his peragendis arceat, ab officio seu procuratione Sororum sibi à Provinciali vel Generali post vota communia Conventus demandatâ, absolvendæ sint.

Ad hæc omnia possunt quædam adjungi adhuc è propriis Regulæ terminis excerpta.

Hæc sunt officia merè claustralia, quæ non nisi simplices administrationes reverâ sonant; nullam dant supra cæteras Sorores præminentiam neque jurisdictionem. Sola cura Abbatissæ est de vestitu Sororum, & de cæteris ad vitam necessariis. Quòd si cum Sororibus dispensandum sit super aliquâ Regulæ observantiâ, consulendus est Provincialis seu Generalis Ordinis sancti Francisci, qui cum ipsâ dispenset. Quòd si aliqua Soror in Regulæ observantiâ defecerit, bene poterit ei mater aliquam poenitentiam injungere, quæ non excedat metas jurisdictionis cujusdam œconomicae: sed si defectus talis sit, ut poenam aliquam mereatur, adeundus Provincialis vel Generalis, qui de tali defectu debet inquirere, & postea, ut ei videtur, statuere.

Quoad receptionem Sororum, nulla potest in Monasterium admitti sine licentiâ Provincialis aut Ge-

neralis. Confessores ab iisdem deputantur, & nullibi in Regula jurisdictio Abbatissæ astruitur, imò passim destruitur, quia dum de ea fit mentio, statim subjicitur; quod ad Generalem vel Provincialem respectivè pertinent correctio, reformatio, regimen & visitatio: quæ verba optimè ponderanda, & excludunt jurisditionem Abbatissæ. Sed ut nullum dubium supersit, eadem Regula statuit amotionem dictarum Abbatissarum esse fere penes arbitrium Provincialis vel Generalis, prout eis pro bono Religionis expedire noverint: quod bene etiam innuit non esse nisi Officia Claustralia & simplices administrationes, & non Præfecturas, ut illæ Abbatissæ aulicæ prætendunt: nam si essent Præfecturæ, prædictæ Abbatissæ non possent ita de facili amoveri, & non nisi cum causæ cognitione possent arceri. Regula statuit è contra Abbatissam, quæ communem vitam ducere non potuerit, aut noluerit, à suo officio sine moræ dispendio debere absolvi; quod fit solo Provincialis, Visitatoris, vel Generalis judicio, sine ullo judiciorum strepitu; quæ omnia facilè evincunt illas Custodias Franciscanarum esse ejusdem omnino conditionis ac qualitatis cum regimine virili Franciscanorum. Quæ cum ita sint, si semel Custodiæ Monialium dicti Ordinis Regiæ nominationi subjacerent, idem jus posset introduci circa Custodias virorum ejusdem Ordinis, quia reverà nulla potest disparitas inveniri; cum hi Monialium cœtus eosdem habeant cum viris Præfectos, seu Observatores & Administratos tam Generales quàm Provinciales, per quos veluti quædam respublica sub Summi Pontificis protectione & autoritate regitur, & cum eadem Regulæ dictæ Moniales inserviant, ac victu, veste, formâ precationum

tionum, aliisque ritibus Franciscanos æmulentur, eodemque sacrorum suorum ministros habeant. Vnde videre est quòd illud regiae jus nominationis non bene cum dicta Regula conveniat, cùm palam sit quòd si semel Rex Christianissimus tales Abbatissas deligeret, non possent ampliùs ab officio suo absolvi per Generales & Provinciales dicti Ordinis, cùm præterquam quod indecorum esset facto Principis per inferiorem derogari, à supremis Galliae Tribunalibus hæ destitutiones seu absolutiones rejicerentur; cùm usu invaluerit apud Gallos, quòd hæ Abbatissæ quæ regia nominatione gestiunt, non possint à suo regimine arceri, nisi de consensu ejusdem Regis Christianissimi, & sic à jurisdictione tum Episcoporum tum Abbatum ejusdem Ordinis quoad earum destitutionem immunes se jactent: quò fiet ut Generalis dicti Ordinis, seu ejusdem Provincialis, suâ propriâ in prædictas Moniales jurisdictione sine facto suo privarentur; quod æquitas non patitur, ut alteri jus quæsitum sine suo facto tollatur, & præcipuè cùm illud jus à Sede Apostolica mutuatur. Quamobrem in hoc de Summi Pontificis auctoritate agitur, qui solus huic novitati potest pro sua pietate se opponere, cùm prædictæ Moniales non possint, cùm sint subditæ Regi Christianissimo, huic juri, licèt Regulæ quam professæ sunt prorsus adversario & contrario, resistere, ita ut cum Propheta exclamare cogantur, & ita supplicare apud Sedem Apostolicam,

Domine, vim patior, responde pro me.

Quoad secundum, quod spectat ad jus Concordatorum, facile est explicare.

Communi omnium supremarum Curiarum Galliae con-

sensu, cui omnes authores Galli adhæserunt, quotquot de Concordatis scripserunt, pronuntiatum est jamdiu, Concordata nullum jus nominationis ad Monasteria Monialium tribuere Regibus Christianissimis. Huc usque Sedes Apostolica ita sensit, nec unquam admisit dictas nominationes, inviolabili Curia Romanæ stilo hætenus observato. Revera Concordata nullatenus comprehendunt Moniales, quia electiones quæ sublatae inveniuntur, sunt hæ in quibus servabatur forma capitis *Quia propter*, & quarum electionum confirmationes in regno solemniter peti consueverant. Inde factum est ut Decanatus Ecclesiarum Cathedralium & Collegiatarum, etsi plerique Electivi à Capitulo & Confirmativi ab Episcopo non subsint Regiæ nominationi, quia licet in eorum electione servetur aliquando forma capitis *Quia propter*, illud non est de essentia talium electionum, cum Concilium Lateranense, de quo illud caput desumptum est, hanc formam præcipuè non adinvenerit, nisi pro Prælaturis, quarum occurrente vacatione Ecclesia dicitur viduata Pastore.

Porro certum est quòd in electione Monialium non servatur ullatenus forma capitis *Quia propter*; sed illa quæ est determinata à cap. *Indemnitibus de electione & electi potestate in 6.* Vnde patet quòd si jus Concordatorum servetur, Rex Christianissimus nullum jus possit habere ad Monasteria Monialium.

Multa possent adduci, quæ adhuc faciunt pro Monialibus; sed cum illud per se sit notorium, ampliori probatione non indiget.

Ipsimet Reges Christianissimi illud sæpius litteris suis parentibus apud Summos Pontifices protestati sunt, se

nullum jus ad nominationem Abbatissarum Monialium in vim Concordatorum habere.

Franciscus I. de facto voluerat nominare ad certa Monasteria Monialium Ordinis sancti Benedicti, sed ejus nominationes semper respuit Summus Pontifex. Nihilominus sub prætextu Indulti Apostolici, quod ei Clemens Papa VII. concesserat, quo privilegia eligendi in Concordatis specialiter reservata suspenderat duntaxat ad vitam dicti Regis Francisci I. idem Rex voluit nominare ad Monasteria Monialium, prætendens eadem debere comprehendere sub nomine Privilegiatorum; sed is sensus non placuit Sedi Apostolicæ, & Paulus Papa III. & post ipsum Iulius Papa III. absolutè terminis Concordatorum inhærentes, rejecerunt illas nominationes regias ad Monasteria Monialium.

Res eò deducta est temporibus Iulii Papæ III. ut ex-canduerit contra Henricum II. Regem, ex eo quòd attentaret ad Monasteria Monialium; quod impulit dictum Regem Christianissimum litteras suas patentes ad eundem Summum Pontificem mittere, quas statim in arcano suo Consilio homologari & publicari jussit, quibus protestatur se nolle nec sensum nec terminos dictorum Concordatorum prætergredi, immo velle in toto regno eadem Concordata servari secundùm eorum tenorem; secundùm quem tenorem declarat se non intendere nominare ad Monastici Ordinis capita, dignitates Ecclesiarum Cathedralium, & præcipuè ad Cœnobia Virginum.

Mediante hac declaratione idem Iulius Papa III. concessit eidem Henrico II. prorogationem ejusdem Indulti concessi à Clemente VII. ad vitam Francisci I. pro suspensione privilegiorum eligendi.

Pius Papa IV. idem Indultum concedere noluit Carolo IX. nisi sub iisdem modificationibus & limitationibus contentis & comprehensis in Litteris patentibus Henrici II. quibus præcisè declaraverat se nolle nominare ad Monialium Monasteria; & ideo dictus Pius Papa IV. curavit in suis Bullis extendi de verbo ad verbum tenorem Litterarum Henrici II.

Curia supremæ Regni Franciæ sæpius in orationibus commonitoriis quas habuerunt ad Reges Christianissimos, fideliter exposuerunt Concordata nullam iis dare facultatem nominandi ad Monasteria Monialium, & omnes authores Galli, Carolus Molinæus, seu Caballinus, Rebuffus, & Chopinus idem senserunt, & in scriptis suis verè & firmiter sustinuerunt. Multoties in Senatu Parisiensi & in magno Regis Consilio lata sunt Arresta contra nominatas à Rege; & electis à Monialium Conventu possessio adjudicata, ipso Procuratore Regis Christianissimi annuente. Contigit tamen temporibus Henrici III. Regis Francorum, cum tunc Gallia intestinis Religionis dissidiis laboraret, nec facile esset ad Summum Pontificem recurrere, quòd idem Henricus III. ægrè ferens à Iudicibus suis sperni eas quas nominatio sua commendabat, voluit de facto sibi tribuere jus nominandi ad Monasteria Monialium; & cum vix illud stabiliri prævideret publicâ Declaratione, quia jus publicum difficile erat violari palam & apertè, advocavit secretò duos Præsides & Consiliarios magni sui Consilii, & eis declaravit se velle nominare ad Monasteria Monialium, ideo se eos appellasse, ut deinceps de sua intentione certiores facti & plenius informati, se gratiores præberent erga Moniales quas nominaret

nominarer, & illis possessionem adjudicaret, quoties inter electas à Conventu Monialium controversia de possessio-
rio apud eos moveretur.

Licet ipsi Iudices magni Consilii ægrè tulerint ejusmo-
di declarationem, tanquam juri Monialium prorsus con-
trariam, tamen quia is rogaverat, qui & imperare pote-
rat, tandem coacti sunt deservire in suis judiciis Regio
placito: sed quia adjecerant in registro secreto, in quo
prædictam declarationem verbalem inscribi de mandato
Regis fecerant, quod Regi supplicaretur, ut intentio-
nem suam declararet, utrum vellet comprehendere omnia
omnino Monasteria Monialium, nec aliqua excipere, in
quibus si admitteretur nominatio Regia, possent insequi
multæ difformitates contrariæ statui prædictarum Regu-
larium: subinde idem magnum Regis Consilium, ex ani-
mo & sensu Principis, ut refert Chopinus author Gallus
qui his temporibus vivebat, judicavit Monasteria Cordi-
gerarum seu Franciscanarum non subjici Regiæ nomina-
tioni; & nonobstante prædictâ Declaratione verbali factâ
anno 1580. judicavit pro electis à Conventu, contra no-
minatas à Rege. Et ita eo tempore quo invecita est nomi-
natio Regis in Monasteria Monialium Ordinis sancti Be-
nedicti, Custodiæ Franciscanarum ab eadem immunes &
liberæ declaratæ & pronunciatæ sunt ab eodem magno
Regis Consilio. Reges Christianissimi deinceps abstinue-
runt à tali nominatione in dictis Monasteriis Ordinis
sancti Francisci.

Non refert hîc indagare ulteriorem progressum Regiæ
nominationis in Monasteria Monialium Ordinis sancti
Benedicti, sed certum est quod Curia Romana nunquam

admisit prædictas nominationes, tanquam factas in vim Concordatorum. De hoc usu præclarum extat testimonium, quod eò luculentius, quò omni suspicione caret. Invenitur in Epistolis Cardinalis d'Ossat, missis ad Henricum IV. dum legatione fungeretur Romæ. Hæc epistola refertur lib. 7. epist. 261. Testatur idem Cardinalis, Reges Franciæ nullum jus habere nominandi ad Monasteria Monialium, & litteras nominationis quæ diriguntur ad hoc ad Summum Pontificem, nullatenus recipi nec admitti ab Officiariis Curiæ; & harum litterarum hunc solum usum esse, ut Ambasciator Regis Christianissimi, qui in Curia degit, permittat sollicitatori in Curia expeditionem Bullarum in favorem nominatæ à Rege per verbum *expediatur*; & hoc facto remittitur littera nominationis in partibus tanquam cassa & inutilis ad obtinendas Bullas à Pontifice.

Nemo de hoc usu dubitabit, qui stilum Curiæ noverit, qui adhuc hodie servatur: nam semper in Bullis Monialium adjicitur clausula, *dummodo majoris partis seu duarum partium ex tribus assensus accedat*: unde supponitur vel prævia electio, vel saltem requiritur in executione dictarum Bullarum, majoris partis consensus, in quo privilegium electionis non omnino spernitur & destruitur, imò aliquatenus conservatur. Sed quia nullæ Moniales possunt habere facultatem resistendi in partibus Franciæ ei, quæ à Rege nominata, Bullis Apostolicis nritur: hæc clausula, *dummodo majoris partis seu duarum partium ex tribus accedat assensus*, nihil operatur, & sic contra intentionem & voluntatem Summi Pontificis accidit, ut hodie indirectè & hac viâ, sine ullâ Sedis Apostolicæ participatione, plera-

que Monasteria Monialium Ordinis sancti Benedicti Regiæ nominationi in partibus subiecta inveniuntur.

Sed hætenus Custodiæ Franciscanarum ab illo ambitu immunes ~~fr~~erant, quod facile patebit per Registra Cancellariæ Apostolicæ, ubi nullæ Bullæ provisionis à quadringentis annis & ampliùs de iisdem Custodiis à Sede Apostolica concessæ inveniuntur.

Remanserunt enim in pacificâ & quietâ possessione eligendi sibi Matres, quæ à Generali Ordinis sancti Francisci, vel ejus Provinciali respectivè probatæ sunt : & sic videre est jus novum, quod invehere aliquæ Aulicæ Abbatissæ conantur, nullo titulo suffultum, & Concordatis ac Regulæ prædictarum Monialium prorsus adversari : & nisi tali novitati via per auctoritatem Sedis Apostolicæ, paternâ quâ omnibus providet charitate, præcludatur, idem brevè in prædictis Monasteriis Franciscanarum continget, quod jam accidit in Monasteriis Ordinis sancti Benedicti, licèt longè deberent esse disparis fortis & conditionis.

Cùm ex his pateat jus nullum habere Reges Christianissimos in dicta Monasteria Monialium, longa & intacta possessio in qua hætenus Moniales sancti Francisci vixerunt, debet eas saltem tueri, cùm etsi jus stabilitum inveniretur per Concordata, libertatem potuissent reacquirere per spatium centum & sexaginta annorum, qui ab anno 1516. quo prædicta Concordata publicata sunt, usque ad præsens tempus effluxerunt.

Iam si longa ætas auctoritatem Religioni potest facere, proculdubio servanda est tam longæva possessio, præcipuè cùm Regulæ à Summis Pontificibus traditæ,

requirante Rege Christianissimo, innitatur.

Nunc de tertio agendum, in quo quæritur de privilegiis Monialibus Ordinis sancti Francisci concessis. Certum est privilegia eligendi in Concordatis reservata: legatur §. *per præmissa*, post titulum *de Regia ad Prælatum nominatione facienda*, ibi expressissimis verbis à Regia nominatione excluduntur Monasteria & Ecclesiæ, quæ privilegium proprium eligendi Prælatum à Sede Apostolica obrinuerunt.

Porro constat Bullam Urbani Papæ IV. privilegium speciale cuilibet Monasterio tribuere eligendi Matrem seu Abbatissam; & progressu temporis pleraque Monasteria dicti Ordinis privilegia adhuc singularia à Summis Pontificibus habuerunt, ut videre est in Monasterio sancti Marcelli prope Parisios, in quo Bulla originalis Nicolai Papæ IV. invenitur, in qua prædictum Monasterium sub speciali Sedis Apostolicæ protectione suscipitur, & inter alia statuitur, quod nulla inibi debeat Abbatissa constitui, nisi quæ communi Sororum suffragio electa fuerit.

Plerisque aliis Monasteriis idem omnino indultum est; unde apparet violari privilegium à Sede Apostolica concessum, si electio destruat.

Iactent quantumlibet illæ Regiæ nominationis aucupes, privilegia eligendi abrogata esse, nusquam illud astruent; imò adhuc remanent in viridi observantia.

Effatum est Iurisconsultorum, quod limitatio quæ in lege continetur, æquè firma sit ac ipsa lex. Itaque cum exceptio inveniat in Concordatis in favorem Monasteriorum & Ecclesiarum quæ eligendi privilegium à Sede

Apo-

Apostolicâ habuerunt , aut legem Concordatorum everti necesse est , aut prædicta privilegia | servari intacta.

Veritati historiæ repugnat , privilegia eligendi ulla-
tenus abrogata , huc usque Regiæ ordinationes ea ad-
huc locum habere declaraverunt , & reverâ Monaste-
ria quæ tale privilegium inventa sunt habere , in pri-
vilegio eligendi conservata sunt plerisque supremorum
Tribunalium Franciæ Arrestis.

Stilus Curia bene evincit etiam talia privilegia non
sublata cùm in omnibus Bullis quæ in Curia Romanâ
expediuntur pro Beneficiis Consistorialibus virorum ,
quæ sine dubio subsunt Regiæ nominationi lege Con-
cordatorum , semper hæc clausula inseritur , *quod illud
jus nominationis habet locum ad Monasteria privilegio eli-
gendi non suffulta.* Sunt hæc ipsissima verba Bullarum ,
quæ pro Beneficiis Consistorialibus Galliæ expediun-
tur , & quæ quotidie ad instantiam Regis Christianis-
simi & de ejus consensu in regno suo executioni de-
mandantur. Ex quibus patet quantum aberrent à veri-
tate hi qui privilegia eligendi à Sede Apostolicâ in-
dulta volentes destruere , prædicant hæc abrogata esse
de consensu Summi Pontificis. Vt , quod certum est in
ea re , notum sit omnibus , advertendum est Franci-
scum I. Regem Francorum cùm videret nominationes
suas ad Beneficia Consistorialia virorum plerumque
cludi per illa privilegia eligendi reservata specialiter in
Concordatis , petiit à Clemente Papa VII. ut illa pri-
vilegia omnino revocarentur : sed noluit idem Pontifex

hanc revocationem concedere, & solummodo concessit suspensionem ejusmodi privilegiorum quoad viveret dictus Rex Franciscus I.

Idem Indultum suspensionis prorogatum est ad vitam Henrici II. Francisci II. & Caroli IX. sed nullatenus ad tempora aliorum Regum productum est. Vnde patet quòd illa privilegia pristinas vires resumpserunt, ex quo eorundem suspensio cessavit. Et sic si jus spectetur Concordatorum, licet prætenderetur Monasteria Monialium in iis comprehendi, certè Custodiæ Franciscanarum, quarum electio pertinet ad Conventum speciali Sedis Apostolicæ privilegio, à regia nominatione deberent eximi.

Ad hæc omnia accidit, quòd si regimen Sororum Inclusarum Minorum mutaretur hoc prætextu regie nominationis, necesse esset quòd Sedes Apostolica cum ipsis supra vota quæ emisissent, dispensaret: nam formula voti determinata est ab Urbano Papa IV. in prædictâ Regulâ, & inter cætera vovere debent Moniales, se in omnibus servaturas Regulam eis à dicto Urbano IV. traditam. Itaque cum de essentiâ Regulæ sit, ut electio pertineat liberè ad Conventum, confirmatio verò seu amotio ad Generalem Ordinis sancti Francisci, aut in ejus absentiam ad Provinciale; non possunt aliam Matrem agnoscere sine manifestâ Regulæ infractione.

Ex his omnibus manifestum est, quòd regia nominatio non potest admitti in Monasteriis Sororum Inclusarum Ordinis sancti Francisci, nisi statim destrua-

tur earum Regula à Summis Pontificibus tradita, & ad hæc usque tempora de consensu Regum Christianissimorum in partibus observata.

Quod quidem repugnat omnino decretis sacri Concilii Tridentini, quod vetat ne aliquid in Ordinibus Regularibus immutetur, quod Regulæ perfectionem possit tantisper alterare: quia, ut senserunt sancti Patres in hoc Concilio congregati, si illa quæ sunt fundamenta totius Regularis disciplinæ non fuerint conservata, totum corruat ædificium necesse est.

*C. I. sess. 25.
de Reform.*

Idem Concilium statuit de electione Abbatissarum & Priorissarum Monialium, ne eligantur aliæ quàm ejusdem Ordinis, quæ non sint minores annis quadraginta, & quæ octo annis post expressam professionem laudabiliter vixerint. Et adjicit, quòd servantur singulorum Ordinum vel Monasteriorum constitutiones.

C. 7. eodem.

Porro violantur apertè illa decreta sacri Concilii per prædictas nominationes regias, non solùm quia per prædictas dicti Ordinis constitutiones jus eligendi Matrem seu Abbatissam pertinet ad Conventum, sed etiam quia tales nominatæ à Rege Christianissimo, quæ hodie Bullas provisionis à Sede Apostolica subreptitiè obtinere conantur, non sunt professæ Ordinis sancti Francisci, sed Ordinis sancti Benedicti, quod resistit omnibus juribus. Nam etiamsi jus illud nominandi posset tribui Regi Christianissimo in vim Concordatorum, eadem lege teneretur nominare Sedi Apostolicæ ad Monasteria Religiosos expressè professos ejusdem Ordinis, à quo dicta Monasteria dependent.

Et reverâ quomodo posset præfici Monasterio sancti Francisci Benedictina, quæ vitæ instituta Monialium nec novit nec experta est?

Quòd si illæ Benedictinæ prætendant se desiderio vitæ arctioris ad Ordinem sancti Francisci velle transire, quis non videat se hoc vano prætextu velle illudere Sedi Apostolicæ, & suam ambitionem, & imperandi cupidinem improbam conari sub illâ fictâ pietatis larvâ abscondere?

Nam præterquam quòd pleræque ex dictis Abbatissis à proprio Monasterio contra Interdictum Concilii Tridentini jamdiu absunt, nec cum propriis Sororibus potuerunt proprium vitæ institutum observare; si vellent reverâ converti ad vitam arctiorem, non deberent auspicari à Præfecturis quas sibi fingunt, ut dominantur. Lex Christiana, & Regula sancti Francisci damnat tanquam indignas, eas quæ dominatum ambiunt: quomodo ergo possunt prætere se spiritu & animo pietatis apud Sedem Apostolicam supplicare, ut in Ordinem Franciscanarum recipiantur? His artibus & his præstigiis Deo & ejus Vicario in terris non illuditur.

Sed si nulli mortali licet intimos cordis recessus scrutari, saltem deberent illæ Benedictinæ se per multos annos tyrocinio juvenularum erudire in praxi Regulæ sancti Francisci, & non statim irruptione quâdam factâ regimen supremum invadere in Ordinem quem non probaverunt. Intempestivæ illæ ad primatus Ecclesiæ evectiones à Canonibus & ab Ecclesiæ Patribus
semper

semper damnatae sunt. Cum dixit Apostolus, *Nemini cito manum imponas*, praeceptum dedit ut scirent omnes qui ad aliquod in Ecclesia ministerium aspirant, se debere diu antea probare, quia servus fidelis & prudens quis inveniatur, nisi se antea in his quae ei sunt peragenda talem exhibuerit.

Exclamat Augustinus ad Valerium: *Quid absurdius quam ei gubernacula tradere, qui remum tenere non novit.*

In ipsis militiis saecularibus hoc observatur, ut nullus ad aliquam praefecturam statim evehatur; debet prius erudiri in officiis inferioribus, nec ea ipsi Principes detrectant ut melius postea imperent.

Quae plaga fiet Religioni Christianae, si non solum libertas canonica destruat, sed etiam si tales Abbatissae praeficiantur in Monasteriis Ordinis sancti Francisci? *Nulla ars*, inquit Hieronymus in epistola ad Rusticum Monachum, *absque magistro discitur*. Et ipsemet Eustochium, Laetam, Pacatulam, Demetriadem, Caeculantiam, Fabiolam virgines viduasque informat & instruit ad cilicium, fletum, jejunium & castigationes. Sic tyrocinio monastico prius Laetam virginem institui voluit, *quia*, ut inquit, *erudienda est anima, quae futura est templum Dei*. Dum loquitur deinde de iis quae debent Monasteriis Monialium praefici, non novitias & rudes adhuc in regulae observantia requirit, sed virgines veteranas, quae jam emeritae sint, & quae alias doceant & assuescant exemplo ad orationes & Psalmos nocte consurgere, mane hymnos canere, tertiâ, sextâ, nonâ horâ stare, quasi bellatrices Christi reddere sacrificium vespertinum.

Videant hæ quæ Custodias Franciscanarum tanquam Præfecturas ambiunt, quod onus iis impositum sit: videant si se prius ad cilicium & jejunium velint probare. Regula non nisi eis stramineas culcitrâs ad decumbendum permittit, non licet linea habere, lacerâ veste fune canabeo & nodis intertexto Franciscum ducem debent æmulari: paupertas ubique commendatur. *Plerique, inquit Hieronymus, Crucifixum adorant, sed nuditatem Crucifixi abhorrent.*

Faxit Deus ut hæ Abbatissæ, quæ sic regimen in Ordine Franciscano affectant, resipiscant, & videant quid agant. Recordentur quòd in quâ quæque Regulâ professâ fuerit, in eâdem & judicabitur: & ideo usus invaluit, ut mortuis Regula in manibus deponatur, ut ante conspectum Divinæ Majestatis ita se exhibeant, ut rationem reddant de omnibus quæ voverunt. Hoc est ipsum quod omnes Moniales Ordinis sancti Francisci ita anxias reddit. Lubenter recipere nominatas à Rege Christianissimo, si eis liceret: sed Regula eas admonet se nullam debere pro Matre seu Abbatissa recognoscere, nisi quæ nullâ subreptionis astutiâ aut violentiâ à communi Sororum Conventu electa fuerit.

Advertant etiam peregrinæ illæ Moniales, quæ Ordini sancti Francisci licet advenæ præfici volunt, ne in reprobationem ponantur. Tremenda sunt Dei judicia, & investigabiles ejus viæ. Audiant adhuc Cyprianum lib. de habitu virg. *Dum evagari virgines volunt, virgines esse desinunt, furivo dedecore corruptæ, viduæ antequam nuptæ, non mariti, sed Christi adulteræ.*

Recludantur in propria Monasteria. Ut in castris cuilibet militi sua est statio, è quâ non licet ei sine jussu summi ducis exire: ita in Claustris cuilibet Moniali sua sedes, & certæ ac distinctæ ab aliis functiones; cuilibet sectæ Monacharum sunt sua decreta, leges & regulæ quas debent observare, & secundum quas judicabuntur. Benedictina secundum Regulam sancti Benedicti, Franciscana secundum Regulam sancti Francisci vivat. Sua cuilibet in suo Ordine à Deo designata est statio, è qua sine jussu ejusdem, aut ejus in terris Vicarii, non debet exire.

Non possunt ergo sedes suas mutare sponte, hoc utilitas Ecclesiæ non exposcit; cum è contrà hæ mutationes non possint introduci sine magno ejus dispendio. Hoc non exigit Monasteriorum Franciscanarum necessitas, cum illud non possit fieri sine Regulæ quam profitentur destructione: huc usque vixerunt pacificè sub talis Regulæ observantiâ, hanc professæ sunt, & secundum eam se Deo publicè per vota solemniter dedicaverunt.

Hanc Regulam Summus Pontifex tradidit ad instantiam sancti Ludovici Regis Christianissimi. Quæ semel Deo dicata sunt, non debent amplius ulli novæ servituti subjici. Tam sanctus Pontifex, & Rex æquè pius ac sanctus communi voto dederunt Sororibus Inclusis Minoribus facultatem eligendi liberè, id est independentem ab omni potestate sæculari, proprias Abbatissas, confirmationem ejusmodi electionis concesserunt in perpetuum Generali Ordinis sancti Francisci, vel ejus Provincialibus.

Leo & An-
themius,
L. iubemus,
Cod. de Sa-
crostis Ecce-
sis.

Quomodo Rex Christianissimus poterit Pontificiæ & Regiæ donationi derogare? teneretur potius, si aliquis contra eam vellet attentare, eandem stabilire & confirmare. Bene Imperatores Romani voluerunt quòd illud quod semel Ecclesiæ à Principibus indultum est, firmum & inconcussum maneat, quia ut ipsimet agnoverunt, *sicut ipsa Religionis & Fidei mater perpetua est, ita ei concessum, servari debet illæsum.*

Certè si licuisset dictis Sororibus Inclusis supplicare apud Regem Christianissimum, ipsemet pro sua iustitia & pietate privilegium & Regulam à sancto Ludovico Rege Franciæ à sancto Pontifice expostulatam custodiri iussisset. Sed Regiæ Majestati hæc Aulicæ Abbatissæ non exposuerunt verum dicti Ordinis sancti Francisci statum, immo potius palam has Custodias esse veras Præfecturas prædicaverunt, ad quas Rex idem Christianissimus debet nominare in vim Concordatorum. Vnde sperant dictæ Sorores sancti Francisci, si semel de hoc per Summum Pontificem informetur Rex Christianissimus, cùm hæc sola via supersit, communi adhuc Sedis Apostolicæ & Regiæ Majestatis munificentia, id quod ab Urbano Papa IV. & à sancto Ludovico receperunt, & huc usque fideliter custodierunt, se recuperaturas, & novo splendore Pontificium & Regium munus susce-
pturas.

Ex his patet quod non solum agatur de dictarum Sororum causâ, sed de publico Religionis statu: nam si Regula semel à Summo Pontifice, Regis Christianissimi

nissimi precibus condescendente tradita, post quadringentos & amplius annos statim evertatur, nihil est quod in Ecclesiâ firmum & stabile possit inveniri. Nihil aliud efflagitant dictæ Sorores, quàm ut in qua Regula hactenus institutæ fuerunt, & pacificè vixerunt, liceat eis usque ad extremum vitæ spiritum degere. Sanctus Hieronymus ita contra novitates sui temporis invehebatur: *Cur post quadringentos annos & amplius docere nos niteris quod antea nescivimus? cur profers in medium quod Petrus & Paulus edere noluerunt sine ista doctrina, mundus Christianus vixit, illam senex tenebo fidem, in qua puer ego natus sum.*

Eadem hodie omnes Sorores Inclusæ cum lacrymarum effusione proferunt, consuetudinis amor magnus, & præsertim cum Religione, innititur; ad hæc usque tempora eas pius ritus adduxit, ut liberè Matres suas eligerent; petunt supplices, ut eis liceat vivere more suo, quia hanc libertatem eligendi à Summis Pontificibus & à Regibus Christianissimis habuerunt. Cur post quadringentos annos & amplius eas docere quod antea nescierunt? cur proferre in medium jus novum, quod tot sancti Pontifices, & tot Reges Christianissimi, etiam à tempore Concordatorum edere noluerunt? Sine illis nominationibus feliciter Ordo Franciscanarum floruit; illam senes tenebunt Regulam & fidem, quam juvenulæ & in tyrocinio Monastico susceperunt.

Hoc à Deo, cujus sunt sponsæ; hoc à Summo Pontifice ad ejus pedes provolutæ exposcunt; & in hoc

Regem Christianissimum tanquam suum authorem,
 cum sit successor sancti Ludovici, appellant, & ab eo
cum debitâ subjectione reliquias suæ libertatis & electio-
 nis quæ eis aufertur, reposcunt. Tot titulis suffulta
 sperant quòd illæ novæ Abbatissæ probabunt quòd
 mendaces precatrices debeant carere impetratis.



